

paróna? disighe che la la viégno a vidi, vánti chi sa mulémo²⁸⁾, chi zémo veía.“ — La va là da la su paróna, sta siérva, e la ga deí: — „Siúra paróna, che biél bárco che zi custá²⁹⁾ al mul!³⁰⁾ la vághi a vídalo, vánti chi vágo veía.“ —

Sta paróna, la sa vésto: l'insiéra li puórte de cása. la sa méto li ciáve in scarsiéla e lá va a vidi el bárco. La va drénto, in cuviérta; a sálta fóra Piereín e 'l ga zeí: — „La viégni a vidi li cánbare.“ — Intánto che Piereín la purtíva a vidi li cánbare, el cavaleín cassiva veía la zénto.

Furneí che l'úo da vidi li cánbare, la zi vignoûda de recávo soûn, fóra in cuviérta; e, soûn che la zi vignoûda, la s'úo catá in miézo al mar, la deí: — „Adiéssó chi iéó³¹⁾ da fá?“ — La nu fá né ben né mal; la ciápa li ciáve, la li boûta in mar, la deí: — „I turnarié al ma país, cu stu mássó de ciáve vignaruó a vílo³²⁾ sùle.“ — Piereín, intánto, cu la su fragáda e la Biéla dal móndo, el zi turná là dal ri. Cu la fragáda gíra in preíma veísta, el ri fa issá bandéra: sbári ch' a ven la Biéla dal móndo.

I reíva in puórto, i sa cuósta, i dasmónta: Piereín e 'l cavaleín. — „Ben viégna“, ga deí el ri. — „Quá, — Sácrá Maistá, la Biéla dal móndo.“ — „Va ben; ga deí el ri.“ — La fáda ga túrna a deí al ri: — „Sácrá Maistá, el g'úo ciúlto la pína, el g'úo ciúlto el pavón, el g'úo ciúlto la Biéla dal móndo, el ga va a ciú áncá li ciáve in miézo al mar.“ — Ciamímalo, ga deí el ri. — „Quíl zúvano, Su Maistá de recávo va ciáma!“ — „Chi vól lo, Sácrá Maistá? i gh' ié fáto tánti piaçiri; ancúra el vol chi ga na fágo?“ — „Fíme³³⁾ ancúra quísto: i m' aví ciúlto la pína, i m' aví ciúlto el pavón, i m' aví ciúlto la Biéla dal móndo, zalá³⁴⁾ a ciúme áncá li ciáve in miézo al mar.“ — „Cumú el vol chi vágo a ciúgale? El vol ch' i ma boûto in áqua?“ — El túrna a zeí dal cavaleín, doûto a piurándo, e 'l ga deí: — „Cavaleín, biél cavaleín, ti m' ié deíto che quíla pína saruó la ma muórto!“ — El ga deí el cavaleín: — „Chi el t'úo deíto el ri?“ — „El m'úo deíto, el deí, chi vágo a ciúghe li ciáve in miézo al mar.“ — „Ben; el deí, déighe che 'l ta dágo

²⁸⁾ Stacciamo. ²⁹⁾ Accostato. ³⁰⁾ Molo. ³¹⁾ Ho io. ³²⁾ A galla. ³³⁾ Fatemi. ³⁴⁾ Andate.